

Na osnovu člana 22. i 24. stav (1) Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst) i člana 65. stav (4) Zakona o policijskim službenicima Kantona Sarajevo ("Službene novine Kantona Sarajevo", broj 25/06), Vlada Kantona Sarajevo na Devetoj sjednici, održanoj 19. aprila 2007. godine, donijela je

## **UREDBU**

### **O PRIVREMENOM EKSTERNOM PREMJEŠTAJU POLICIJSKIH SLUŽBENIKA MINISTARSTVA UNUTRAŠNJIH POSLOVA KANTONA SARAJEVO**

#### **Član 1. (Pojam)**

Ovom Uredbom uređuje se postupak privremenog eksternog premještaja policijskih službenika Uprave policije Ministarstva unutrašnjih poslova Kantona Sarajevo (u daljnjem tekstu: Uprava policije) u drugi policijski organ, organizacionu jedinicu, organ uprave, ustanovu za policijsku obuku, drugu instituciju ili ured u skladu sa Zakonom o policijskim službenicima Kantona Sarajevo (u daljnjem tekstu: Zakon).

#### **Član 2. (Saglasnost policijskog službenika)**

Privremeni eksterni premještaj moguć je samo uz saglasnost policijskog službenika.

#### **Član 3. (Slučajevi privremenog eksternog premještaja)**

Privremeni eksterni premještaj policijskog službenika vrši se u slučajevima:

- a) postojanja potrebe policijskog organa, drugog tijela i institucije koja traži takav premještaj za vršenje poslova koji zahtijevaju policijske ovlasti;
- b) postojanja potrebe stalnog osiguravanja ličnosti ili zgrada; i
- c) postojanja potrebe za davanjem procjene ili savjeta u vezi sa policijskim pitanjima.

#### **Član 4. (Trajanje premještaja)**

Privremeni eksterni premještaj ne može trajati duže od četiri godine, a može se obnoviti samo u drugom uzastopnom periodu.

#### **Član 5. (Zahtjev)**

Zahtjev za privremeni eksterni premještaj dostavlja se Ministarstvu unutrašnjih poslova Kantona Sarajevo od strane rukovodioca policijskog organa, organizacione jedinice, organa uprave, ustanove za policijsku obuku, druge institucije ili ureda koji potražuju policijske službenike.

#### **Član 6. (Sadržaj zahtjeva)**

Zahtjev za privremeni eksterni premještaj mora sadržavati razloge za potražnju policijskih službenika i vremenski period trajanja eksternog premještaja.

Član 7.  
(Odabir)

Po nalogu ministra unutrašnjih poslova Kantona Sarajevo, policijski komesar izvršit će odabir policijskih službenika, odnosno policijskog službenika.

Član 8.  
(Način odabira)

(1) Policijski komesar će odabrati policijskog službenika koji će biti eksterno premješten putem internog oglašavanja ili neposrednim izborom.

(2) Za odabir policijskih službenika putem internog oglašavanja shodno se primjenjuju odgovarajuće odredbe propisa o internom premještaju policijskih službenika Uprave policije.

(3) Uz prijavu na oglas, kao i u slučaju neposrednog izbora, policijski službenik prethodno daje svoju pismenu saglasnost na privremeni eksterni premještaj.

Član 9.  
(Rješenje o privremenom eksternom premještaju)

Policijski komesar o privremenom eksternom premještaju donosi rješenje, koje treba da sadrži:

- a) ime i prezime policijskog službenika sa ličnim podacima;
- b) radno mjesto, poziciju, odnosno dužnost na koju se vrši premještaj;
- c) vremensko trajanje premještaja; i
- d) prava po osnovu rada i statusa koja proističu iz privremenog eksternog premještaja, uključujući i pravo na povratak na rad u Upravu policije na odgovarajuće radno mjesto, odnosno poslove i zadatke uz saglasnost policijskog službenika.

Član 10.  
(Prava i obaveze)

Tokom trajanja privremenog eksternog premještaja, policijski službenik zadržava svoj čin, prava i odgovornosti iz radnog odnosa koje je imao u Upravi policije, a istovremeno preuzima obaveze radnog mjesta, odnosno pozicije na koju se privremeno premješta, osim ukoliko se ne dogovori drugačije.

Član 11.  
(Ravnopravnost spolova)

Gramatička terminologija u ovoj Uredbi podrazumijeva uključivanje oba spola.

Član 12.  
(Stupanje na snagu)

Ova Uredba stupa na snagu narednog dana od dana objavljivanja u "Službenim novinama Kantona Sarajevo".

---

Broj 02-05-7162-5/07  
19. aprila 2007. godine  
Sarajevo

---

Premijer  
**Samir Silajdžić**, s. r.